



UNIVERSITÄTS-
BIBLIOTHEK
PADERBORN

Universitätsbibliothek Paderborn

Marii Mercatoris S. Augustino Æqualis Opera Quæcumque Extant

[Complectens Ea Quæ Ad Hæresim Nestorianam Spectant]

Marius <Mercator>

Parisiis, 1673

Caput XXXIII. De Christi passione; & quod vtile sit, quod secundum aliud & aliud de vno & eodem dicitur, nec dividimus in duo.

urn:nbn:de:hbz:466:1-14215

CAPUT XXXII.

Aliud.

Dan. 7. v. 13.

BEATUS Daniel horribilem visionem nobis exponens: *Videbam, inquit, in visione noctis, & ecce cum nubibus celi quasi filius hominis veniens, & usque ad vetustum dierum pervenit, & in conspectum ejus adduxerunt eum, & ipsi datus est honor, & regnum, & omnes populi, tribus, & lingua ipsi servient: potestas ejus potestas in aeternum, quae non transgreditur, & regnum ejus non corrumpitur. Audis quemadmodum non hominem simpliciter se vidisse commemoret, ne vnus ex nobis, & juxta nos Emmanuel esse credatur; sed quasi filium hominis; [Cum enim Verbum natura sit Deus; in similitudine tamen hominum factum fuit, & inventum est habitu ut homo, ut in eodem vtrumque intelligatur, id est, neque homo nudus, neque Verbum absque humanitate & carne.] tamen ei principatum & honorem, quae semper habebat, data esse commemorat: ait enim quod omnes populi, tribus, & lingua ipsi servient. Cum igitur etiam in humanitate positum vngentum Dei Verbum fervientem habeat creaturam, & Patris principatum & suum, pepererit autem secundum carnem ipsam sancta Virgo; quomodo non intelligitur *θεοτόκος*?*

Citat Leon-
tius lib. 1.
contra Euty-
chianos.

CAPUT XXXIII.

Apostolus
XVIII.

De Christi passione; & quod utile sit, quod secundum aliud & aliud de vno & eodem dicitur, nec dividimus in duo.

Heb. 2. v. 9.

1. Cor. 15. v. 3.

1. Pet. 4. v. 1.

SANCTUS Paulus salutarem passionem nobis exponit, ait namque: *Nunc gratia Dei pro omnibus gustavit mortem; nec non etiam: Tradidi enim vobis in primum, quod & accepi: quoniam Christus mortuus est pro peccatis nostris, secundum Scripturas: & quia sepultus est, & quia resurrexit tertia die. Ad hoc etiam sapientissimus Petrus: Christo, inquit, passus pro nobis carne. Cum vnum igitur credimus Dominum nostrum JESUM CHRISTUM, id est, in humana forma conspectum, sive hominem factum juxta nos, Deum Verbum, quomodo & passionem ipsi deponemus, & impassibile tamen servemus, ut Deum?*

Ergo passio dispensationis erat, sua quidem ducente Deo Verbo ea, quae sunt propria carnis, propter inenarrabilem unitatem; manente vero extra passionem, quantum ad ipsius naturam pertinet: impassibilis enim Deus est. Neque id mirum, cum & ipsam hominis animam videamus, siquid corpus passum fuerit, extra passionem quidem manentem, quantum pertinet ad naturam; attamen non extra passionem esse intelligi, eo quod proprium sit corpus ipsius, quod patitur. Et

licet incontigua sit, & simplex; tamen id quod patitur, non est alienum. Sic intelliges etiam de Christo omnium salvatore. Utar autem exemplis, quae, quasi per aenigma, nobis possint ostendere, quod communicavit quidem passioni Unigenitus, quantum pertineat ad familiaritatem corporis sui; manserit autem passionis expers, ut Deus.

Itaque Deus omnipotens prodigia sapientissimo Moyse jubebat efficere, ut crederet ei Israel, quod esset missus a Deo, & ut a violentia liberaretur; ait autem: *Et accipies aquam de flumine, & effundes super terram, & erit aqua, quam accipies a flumine, sanguis super terram. Inquit, quod aqua quidem figura sit vitae, & quod sit per naturam vita filius ex Patre tanquam ex flumine exiens, ejusdem substantiae ratione; itaque omnia vivificat: Sed cum aquam, inquit, effuderis super terram, erit sanguis. Verbum, cum factum est caro de terra, id est, quando a terra carnem sibi circumdedit, tunc in ea mortem nostrae similem dicitur passum, licet per naturam sit vita.*